

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- जम्मू रियासी लोकसभा सीट लेई चुनां प्रचार कल सम्पन्न होई गेआ। वोट कल पोआए जांगन। 17 लक्ख 80 जहार कोला मते मतदाता 22 मेदवारें दे सियासी भविक्ख दा फैसला करगंन।
- जम्मू लोकसभा च 340 मतदान केन्द्रें गी संवेदनशील केन्द्रें दी श्रेणी च रखेआ गेदा ऐ।
- सेहत सचिव होरें औंदी श्री अमरनाथें दी यात्रा लेई सेहत दिक्खभाल सरबंधी तैआरिएं दा जायजा लैता।
- आईपीएल क्रिकेट च कल दिल्ली कैपिटल्स नै गुजरात टाइंट्स गी 4 रंज कन्नै हराई दित्ता।

<><><><><><>

Jammu Voting

जम्मू लोकसभा सीट लेई कल होने आले मतदान च कोई 17 लक्ख 80 जहार कोला मते मतदाता, चुनां मैदान च उतरे दे 22 मेदवारें दे सियासी भविक्ख दा फैसला करगंन। इस मतदान लेई चुनां प्रचार कल संजा खत्म होई गेआ। रियासी, सांबा,त्र जम्मू जिले ते राजौरी जिले दे किश हिस्सें च फैले दे इस जम्मू लोक सभा हल्के हेठ कुल 18 विधानसभा हल्के पौंदे न, जित्थें मतदाताएं दी कुल गिनतरी 17 लक्ख 80 जहार 835 ऐ। इंदे चा 9 लक्ख 21 जहार 95 मर्द मतदाता न, 8 लक्ख 59 जहार 712 महिलां ते 28 ट्रांसजेंडर मतदाता न। अधिकारिक जानकारी मूजब जम्मू जिले च सब्बने शा मते 11 विधानसभा हल्के दे 11 लक्ख 89 जहार 389 मतदाता न जिसलै जे रियासी जिले च त्रे विधानसभा हल्के ते 23 लक्ख 52 जहार 62 मतदाता न। तोआई सांबा जिले च बी त्रै विधानसभा हल्के पौंदे न जित्थें जे मतदाताएं दी गिनतरी 2 लक्ख 59 जहार 198 ऐं जिसलै जे राजौरी जिले दा जिन्ना हिस्सा इस लोकसभा हल्के हेठ पौंदा ऐ। उत्थें शडी इक “कालाकोट सुंदरबनी” विधानसभा सीट पौंदी ऐ जित्थें 96 जहार 986 योग्य मतदाता न।

<><><><><><>

Vulnerable Polling Station

भारतीय चुनां आयोग नै जम्मू पार्लिमान्नी हल्के दे 340 मतदान केन्द्रें गी संवेदनशील दस्सेआ ऐ, इत्थें कल मतदान होना ऐ। इस संसदीय हल्के लेई 2 जहार 416 मतदान केन्द्र कायम कीते गेदे न।

आकाशवाणी जम्मू दे जिला संवाददाता अंकुश शर्मा दी रिपोर्ट मूजब जम्मू जिले दे इक ज्हार 4 सौ 88 मतदान केन्द्रें चा 38 संवेदनशील, 15 बड़े मते संवेदनशील घोषत कीते गे न। चुनां आयोग नै रियासी जिले च 425 मतदान केन्द्र कायम कीते न जिंदे 97 संवेदनशील ते 16 बड़े मते संवेदनशील न। राजौरी जिले च 138 मतदान केन्द्र कायम कीते गे न जिंदे चा 88 संवेदनशील ते 14 बड़े मते संवेदनशील दी श्रेणी च औंदे न। सांबा जिले च 365 मतदान केन्द्रें चा 72 मतदान केन्द्र बी बड़े मते संवेदनशील न। इस हल्के च 46 पिक मतदान केन्द्र कायम कीते गे न, इत्थें खास तौर महिला अमले गी तैनात कीता गेआ ऐ। 18 ग्रीन पालिंग स्टेशन ते विशेष जरूरतें आले दिव्यांग मतदाताएं लेई 18 नेह केन्द्र कायम कीते गे न।

<><><><><><>

Election Security

लोकसभा चुनां दे दुए गेड़ तैहत कल मतदान होना ऐ। जम्मू संसदीय हल्के लेई बी कल वोट पाए जांगन। इस्सी दिक्खदे होई जम्मू, सांबा, रियासी ते राजौरी जिले च पौंदे कालाकोट—सुदरबनी विधानसभा हल्के च बी सुरक्षा बंदोबस्त निगगर करी दित्ते गे न। पुलस ते नीम फौजी बलें बक्ख—बक्ख थाहरें पर पलैग मार्च कीता। इसदा मकसद आम लोकें च सुरक्षा दी भावना पैदा करना ऐ। नीम फौजी बल जिंदे च सीआरपीएफ बी शामिल ऐ, गी मतदान आले जिलें च तैनात कीता गेआ ऐ। जम्मू, सांबा ते राजौरी दे सुंदरबनी आले इलाकें जित्थें कल मतदान होना ऐ, च सुरक्षा इंतजाम होर व्यापक करी दित्ते गे न। जम्मू पार्लिमानी हल्के च 340 मतदान केन्द्रें गी संवेदनशील घोषत कीता गेआ ऐ।

<><><><><><>

LS-4th Phase

लोकसभा चुनां दे चौथे गेड़ दे मतदान लेई नामांकन पत्र दाखल करने दा अज्ज खीरी ध्याड़ा ऐ। इस गेड़ तैहत जम्मू कश्मीर दी श्रीनगर लोकसभा सीट लेई बी मतदान होना ऐ। दाखल नामजदगिएं दे कागत पत्रें दी जांच कल कीती जाग। जिसलै जे कोई मेदवार जेकर अपना नामांकन वापस लैना चाह तां ओह 29 अप्रैल तोड़ी इसी परताई सकदा ऐ। इस गेड़ लेई 13 मई गी 9 राज्यें ते इक केन्द्र शासत प्रदेश च कुल 96 लोकसभा सीटें लेई वोट पोआए जांगन।

<><><><><><>

Prohibitory Order

जम्मू दे जिला मैजीस्ट्रेट सचिन कुमार वैश्य होरें दफा 144 तैहत पांबदी आले आदेश जारी कीते न। इस संसदीय हल्के च 26 अप्रैल यानि कल मतदान होना ऐ। आदेश मूजब सार्वजनिक बैठकां करने, 5 थमां मते लोकें दे इक्कै थाहर किट्ठे होने, लाउडस्पीकर दे इस्तेमाल, पर पांबंदी लाई गई ऐ। चुनां आयोग दी हिदायतें ते दिशा-निर्देश मूजब व्यापक ते बड्डे पैमाने पर प्रचार अभियान समाप्त होई गेआ ऐ। हिदायतें दी खलाफवर्जी करने आलें पर सरबंधी दफाएं तैहत कारवाई कीती जाई सकदी ऐ।

<><><><><><>

Samba

आम चुनां 2024 तैहत दुए गेड़ दा मतदान कल होना ऐ। सांबा जिले च बी तैआरियां जोरे-शोरें कन्ने जारी न। सरबंधी मतदान अमले गी मतदान केन्द्रें पर भेजेआ जा'रदा ऐ। इस बारे होर मती जानकारी देआ'रदे न सांबा थमां जिला संवाददाता सतपाल शर्मा.....

<><><><><><>

Health Security

सेहत ते मैडिकल शिक्षा मैहकमे दे सचिव डॉ. सैयद आबिद रशीद शाह होरें कल औंदी श्री अमरनाथें दी यात्रा लेई सेहत दिक्खभाल सरबंधी तैआरिएं दी समीक्षा कीती। आकाशवाणी दे जम्मू संवाददाता नै जानकारी दित्ती ऐ जे बैठक दरान उनें कश्मीर दे सेहत सेवाएं सरबंधी निदेशक होरें गी निर्देश दित्ता जे तेल ते कुदरती गैसे सरबंधी निगमओएनजीसी आस्सेआ 100 बिस्तरें दी छमता आला अस्पताल तैआर करने दे कम्मै च तेजी आंदी जा ते यात्रा दरान 102 ते 108 नंबर पर अम्बुलैसा उपलब्ध रखने दे बंदोबस्त बी पैहले थमां करी रखे जान। बैठका च जानकारी दित्ती गई जे बालटाल ते चंदनवाड़ी च 100 बिस्तरें दी छमता आले अस्पताल सनें 6 बेस अस्पतालें समेत 55 मैडिकल सेंटर यानि सेहत केन्द्र कायम कीते जांगन। उनें दस्सेआ जे यात्रा दरान सेहत दिक्खभाल सरबंधी 1 जहार 415 कर्मी तैनात कीते जांगन। इस बैठका च मजूद डिप्टी डायरेक्टर हैल्थ सर्विसिस जम्मू जेहड़े श्री अमरनाथ यात्रा लेई जम्मू प्रांतैलेई नोडल अफसर बी ऐन, उनें जानकारी दित्ती ऐ जे यात्रा दरान कुसै बी चाल्ली दी अपात स्थिति कन्ने निबड़ने लेइ लखनपुर कोला लेइयै बनिहाल तोड़ी 53 सेहत केन्द्र बनाए जांगन। 20 एएलएस अम्बुलैसें सनें 60 अम्बुलैसां बी तैआर रखियां जांगन। जिसलै जे भगवती नगर आधार कैप ते यात्री निवास चन्द्रकोट च 24 घैंटे दिन रात एह सेवा उपलब्ध रवै।

<><><><><><>

Indian Army

सेना प्रमुख जनरल मनोज पांडे होरें भारती फौज गी आधुनिक, मती मुस्तैद ते नमिणं तकनीकें कन्नै लैस भविक्ख लेई तैआर फौज बनाने दी वचनबद्धता गी फही पक्का कीता ऐ। उनें सब्बनें सरबंधत धड़ें गी गुजारश कीती जे ओह इक तगड़ा राश्ट्री रक्षा तंत्र विकसित करने दे अपने जतनें च तालमेल ते सैहयोग करन। सेना प्रमुख होर कल नमीं दिल्ली च भारती फौज पास्सेआ आयोजित इक सैमीनार ते प्रदर्शनी दरान बोला करदे हे, जेहदा विशे-सार हा तकनीकें गी अपनाने दा ब'रा-जवानें गी सशक्त बनाना। सेना प्रमुख होरें जंग लड़ने आले मंचें ते प्रणालिणं च आत्म निर्भर बनने दी जरूरतै पर जोर पाया ते स्वदेशी तौर पर शोध च आत्म निर्भरता हासल करने लेई आक्खेआ। हाल दे तनाजे दी मिसाल दिंदे होई जनरल पांडे होरें आक्खेआ जे आधुनिक दौर दिणं जंगें च तकनीकें दा महत्व सब्बनें शा मता होई गेदा ऐ।

<><><><><><>

LG Ghazipur

उपराज्यपाल मनोज सिन्हा होरें उत्तर प्रदेश दी गाजीपुर थाहर पूरे पराते विकास च नागरिकें दी भूमका बारे इक कांफ्रेंस गी संबोधत कीता। अपने संबोधन च उपराज्यपाल होरें राष्ट्र दी प्रगति च जन-भागीदारी दी महत्वपूर्ण भूमका गी उजागर कीता। उनें आक्खेआ जे नागरिकें दी शमूलियत पूरे पराते विकास लेई ते नमां ते बेहतर भविक्ख बनाने लेई अत्त लाजमी ऐ।

<><><><><><>

Dismiss

जम्मू कश्मीर सरकार नै पैहले आली जम्मू कश्मीर विधान परिषद च निगरानी रखने दा कम्म करने आले वॉच एंड वार्ड असिस्टेंट गी गुज्जखोरी दे इक मामले च बरखास्त करी दित्ता ऐ। फैयाज अहमद भट्ट नां दे इस मलाजम खलाफ कुसै नै शकैत दर्ज कराई दी ही ते उन्नै सरकारी नौकरी लोआने दा वायदा करियै 5 लक्ख रपे दी गुज्ज लैती ही। शकैतकर्ता शोपियां दे बसनीक दिलावर मंजूर नै शकैत कीती ही जे सरकारी नौकरी दा लालच देई अरोपी नै ओहदे कोला एह रकम लैती ही। इस शकैत पर जांच बढाई गई ही, उसी कसूरवार पाए जाने दे बाद उसी नौकरी थमां बरखास्त करी दित्ता गेआ।

<><><><><><>

Observer Poonch

अनंतनाग-राजौरी संसदीय सीट लेई आम निगरान संजीव कुमार बेसरा ते पुलस निगरान अखिलेश्वर सिंह होरें कल बन्ने कन्ने लगदे पुंछ जिले च चुनां तैआरिएं दा जायजा लैता। पुंछ थमां आकाशवाणी दे संवाददाता नै जानकारी दित्ती ऐ जे जायजा बैठक दरान आदर्श आचार संहिता दी सख्ती नै पालमा, संचार योजना ते शकैतें पर तक्क रखने सरबंधी विषयें पर तफसीली सोच बचार कीता गेआ। निगरानें उत्थें बनाए गेदे चुनां सीगे, स्ट्रांग रूम, कंट्रोल रूम ते मतदान केन्द्रें दा तफसली निरीक्षण कीता ते सरबंधत अधिकारिएं गी लोडचदे निर्देश जारी कीते तां जे चुनां गी पूरी चाल्ली सुतेंत्र, साफ सुथरा ते निपक्ख बनाने दी पक्की बवस्था होई सकै।

<><><><><><>

IPL

आईपीएल क्रिकेट च दिल्ली कैपिटल्स नै कल इक दिलचस्प मकाबले च गुजरात टायटंस गी 4 रंजें कन्ने हराई दित्ता। पैहले बल्लेबाजी करदे होई दिल्ली कैपिटल्स दी टीम नै 20 ओवरें च 4 विकटें दे नुकसान पर 224 रंज बनाए। कप्तान रिषभ पंत नै 42 गेंदें च 88 रंज बनाइयै नाबाद रेह। जिसलै जे अक्षर पटेल नै 43 गेंदें च 66 रंजें दा योगदान दित्ता। गुजरात दी तरफा संदीप शर्मा नै दिल्ली दे त्रै खडारी आउट कीते। एह्दे परते च गुजरात टायटंस दी टीम नै जित्त लेई लोडचदे 225 रंजें दे लक्ष्य दा पिच्छा करदे होई मित्थे गेदे 20एं ओवरें च 8 विकटें मुआइयै 220 रंज गै बनाई सकी। सांई सुदर्शन नै 29 गेंदें च 65 रंज ते डेविड मिलर नै 23 गेंदें च 55 रंज बनाए। अज्ज संजा साढ़े 7 बजे हैदराबाद च सनराइजर्स हैदराबाद दा मकाबला रॉयल चैलेंजर्स बैंगलोर कन्ने होग।

<><><><><><>